



Najaaraq Møller  
Inatsisartunut ilaasortaq, Siumut

## Atuarfitsialak pillugu § 37 naapertorlugu apeqqummut nr.010/2024-mut akissut

31-01-2024  
Suliap normua.: 2024 - 1595  
All. nr. 23817087

Asasara Najaaraq Møller,

Postboks 1029  
3900 Nuuk  
Oqarasuaat: +299 34 50 00  
Email: [ikin@nаноq.gl](mailto:ikin@nаноq.gl)  
[www.nаноq.gl](http://www.nаноq.gl)

Inatsisartut suleriaasiat naapertorlugu apeqqutinnut qujanaq. Apeqqutigineqartut tullinnguuttuni akissuteqarfigissavakka.

### Apeqqut 1: Atuarfitsialak Naalakkersuisunit nalilersorneqassamaarpa?

#### a. Taamaappat, tamanna qaqugu pissava?

**Akissut 1a:** "Atuarfitsialak" tassaavoq atuarfinnik annertuumik aqqissuusseqqinnermik suliaq, nunatsinni 2002-mi atuutilersinneqartoq. Aqqissuusseqqinnermi siunertaavoq nunatsinni meeqqanut inuusuttunullu ilinniartitaanikkut periarfissanik pitsanngorsaanissaq, uku qitiutillugit:

- Atuartoq qitiutillugu atuartitsineq Atuartitsineq atuartup pisariaqartitaanut soqutigisaanullu naleqqussarneqassaaq.
- Piginnaasanik ineriartortitsineq: Karakterigissaarnissaq qitiutinnagu atuartut piginnaasaasa ineriartortinnissaat qitiutillugit.
- Suliniutit ajornartorsiutinullu piviusut aallaavigalugit ilinniarneq: Atuartut inuunerminnut inuiaqatigiinnullu attuumassutilinnik suliassanik suliaqarnikkut ajornartorsiutinillu aqqiinnikkut ilinniassapput.
- Atuarfiup angerlarsimaffiullu akornanni sueqatigiinneq: Atuartup ilinniarnera ineriartorneralu tapersorsorumallugu atuarfik angerlarsimaffillu suleqatigiissapput.
- Nunatsinni kulturi oqaatsillu: Atuartitsinermi kalaallit kulturiat oqaatsillu fagini tamani ilaatinneqassapput.

Aqqissuusseqqinneq marloriarluni nalilersorneqareerpoq. Siullermik suliffiup iluani nalilersuisoqarsimavoq ("Qiteqqunnerani nalilersuineramik" aamma taaneqartoq), taanna Inerisaavimmit ulluni 10.13. november 2010-mi suliarineqarsimavoq.

Qiteqqunnerani nalilersuineramik ilaatigut uku siunertaasimapput:

- atuartut atuartitsinermi pissarsiaannik nalilersuinissaq,
- ilikkagassatut anguniakkanik atuarfinilu nalilersueriaatsinik atorneqartunik nalilersuinissaq,
- atuarfiup aqqissugaaneramik, atuarfiup siulersuisuisa atuuffiinnik atuarfimmillu nakkutilliinermik nalilersuinissaq.

Tamatuma kingorna aaqjissuusseqqinneq avataanit nalilersorneqarpoq, taanna Danmarks Evalueringsinstitutimit (EVA) suliarineqarsimavoq. EVA-p [nalunaarusiani](#) 2015-imi martsimi tunniuppa. EVA-p nalilersuineranik siunertaasimavoq atuarfiup aaqjissuuteqqinneqarnerani qanoq annertutigisumik atuutilersitsisoqarsimanersoq pillugu misissuinissaq. Nalunaarut immikkoortunik pingaarnernik ukuningga imaqarpoq: atuartitsineq, anguniagaq nalilersuinerlu, atuartut, ilinniartitsisut, angajoqqaat, atuarfinni pisortat, atuarfinnik ingerlatsineq, sammisat allat aamma atuarfiit atuartunik tiguisartut.

"Attassiinnarnissamut Ineriartortitsinissamullu pilersaarut 2"-mi takuneqarsinnaasut Naalackersuisut meeqqat atuarfianni atuartitsinerup avataanit misissorluarneqarnissaa kissaatigaat. Nalilersuinermi atuartitsinerup pilersaarusiortarnera naammassineqartarneralu, atuartut matumangga pissarsiarisartagaat kiisalu atuartut ilinniartitsisullu akornanni atugarissaarneq pillugu paasissutissanik misissueqqissaarnissaq qitiutinneqassapput. Tassunga atatillugu nalilersueriaatsit atorneqartartut, periutsit sakkullu aamma inatsit tamatumunnga tunngasoq ilinniartitaanerup aaqjissuussaananeranut inuiaqatigiillu maannakkut pingaartumillu siunissami piginnaasassatut piumasaqaataannut tunngatillugu nalilersoqqinneqassapput. Avataanit nalilersuinissaq suli piffissalernerneqarsimangilaq.

#### **b. Qanoq akeqassangatinneqarpa?**

##### **Akissut 1b:**

Naalackersuisut meeqqat atuarfiini atuartitsinerup avataanit nalilersorneqarnissaanik kissaataannik aningaasartuutissat nalilersussagaanni pilersaarusiortarluqaartariaqarpoq misissueqqissaartoqarlunilu. Aningaasartuutissanut pissutsit arlallit, tassunga ilanngullugit nalilersuinerup annertussusissaa, suliamut immikkut ilisimasalinnik avataaneersunik toqqaanissaq, misissuinerup sivisussusissaa paasissutissanillu katersueriaatsit aalajangersimasut atorneqartussat apeqqutaassapput.

Ilisimatitsissutigineqarsinnaavorli EVA-p 2015-imi nalilersuineru pingaarnertut annertussuseq aallaavigalugu apeqqutinik immersugassanik atuilluni misissuinerusoq 1,816 mio. kr.-nik akeqarsimammat. Ilinniartitaanermit Aqutsisoqarfiup nalilerpaa, atuartitsinermik nalilersueqqissaarniaraanni annertussuseq aamma pitsaassuseq aallaavigalugit nalilersueriaatsit misissueriaatsillu atorneqartariaqartut aammalu 2015-imi nalilersuinermit pineqartumit akisunerungaatsiarnissaa ilimanartoq.

## **2. Naalackersuisut nalilersuiniangippata suna tunngavigalugu Atuarfitsialak nalilersorneqarniangila?**

**Akissut 2:** Apeqqut 1-imut akissut takuuk.

Inussiarnersumik inuulluaqqusillunga

Aqqaluaq B. Egede